

欽定詩義折中

御纂詩義折中卷之十一

彤弓之什二之三

彤弓
彤弓受言藏之我有嘉賓中心貺之鐘鼓既設
一朝饗之

賦也彤弓朱弓也昭弛貌受弓人獻而受之也貺與也鐘鼓大樂也用大樂者饗於廟也饗大飲也周語曰王饗有體薦燕有折俎公當饗卿當燕是也一朝饗之禮成於朝也劉彝曰湛露燕也彤弓饗也燕以示慈惠故至夜而不爲過所以致其厚

也饗以訓恭儉故終朝而卽成禮所以致其欽也
彤弓弨兮受言載之我有嘉賓中心喜之鐘鼓旣設
一朝右之

賦也載抗之也載於弓檠抗體使正言其藏之謹
也喜悅也悅其有功故昵之也右尊也饗之所以
尊之也

彤弓弨兮受言囊之我有嘉賓中心好之鐘鼓旣設
一朝醕之

賦也囊韜也韜於弓衣使色常新言其載之密也

好愛也言不止喜其功正愛其人也醕猶厚也尊而厚之篤而不渝也輔廣曰橐重於載載重於藏好誠於喜喜誠於貺醕厚於右右尊於饗

彤弓三章章六句

詩序曰彤弓天子錫有功諸侯也春秋傳曰諸侯敵王所愾而獻其功王於是乎錫之彤弓一彤矢百旅弓矢千以覺報宴是也呂祖謙曰受言藏之言其重也弓人所獻藏之王府以待有功不敢輕與人也中心貺之言其

誠也中心實欲貺之非由外也一朝饗之言
其速也以王府寶藏之弓一朝舉以畀人未
嘗有遲留顧惜之意也後世視府藏爲己私
分至有以武庫兵賜弄臣者則與受言藏之
者異矣賞賜非出於利誘則迫於事勢至有
朝賜鐵券而暮屠戮者則與中心貺之者異
矣屯膏吝賞功臣解體至有印刳敝而不忍
予者則與一朝饗之者異矣

菁菁者莪在彼中阿旣見君子樂且有儀

比也菁菁盛也莪蘿蒿也中阿阿中也儀禮也此
天子視學而燕師儒也菁菁之莪在彼中阿以比
凡民之秀來自田間也君子教人者也既見君子
而後知其教人也循循善誘使樂之而不以爲苦
且教之以禮使日用動靜之間皆有威儀既興起
其善心又有所持循以進於善則其德日長而至
於成如莪之菁菁然盛也

菁菁者莪在彼中阿既見君子我心則喜

比也莪在沚中資其灌溉以比士在泮宮受其教

澤也君子之教人也樂且有儀如此故天子見而喜之喜其能爲國家長育人材也

菁菁者莪在彼中陵旣見君子錫我百朋

比也莪出沚而在陵以比選造之士進而在位也君子之善教如此則國家收得人之效故天子喜之以爲所以錫我者不啻百朋之多矣

汎汎楊舟載沈載浮旣見君子我心則休

比也楊舟楊木爲舟也汎汎無人操之也舟無人操則浮沈莫定以比國無人治則安危未可知也

既見君子而收得人之效則國家可以久安長治
如楊舟之有浮而無沈矣故天子之心喜而休焉
所謂勞於求賢而逸於得人也

菁菁者莪四章章四句

詩序曰菁菁者莪樂育才也樂師儒之能長
育人才也鹿鳴之三魚麗之三皆所以尊賢
也天保以上治內采薇以下治外皆得賢人
而用之也顧尊而用之者在朝廷育而教之
者在學校學校無才朝廷不可得而用故師

儒之選不可以不慎教化之道不可以不明也且夫聖人之教原非以強人也人性皆善故雖下愚不能無道心因其天良而啟牖之使油然而不容已則樂之矣因其樂善而輔之以威儀以定其命斯強立而不返矣不樂則苦而不入無儀則學而不固樂且有儀內外交養所由學成於下而治隆於上也將欲成天下之人才者讀菁莪之詩其亦可以深長思矣

六月棲棲戎車旣飭四牡騤騤載是常服玁狁孔熾
我是用急王于出征以匡王國

賦也棲棲猶皇皇飭整也常服軍裝熾盛匡正也
厲王之居弒也玁狁內侵宣王卽位命尹吉甫伐
之也朱子曰司馬法冬夏不興師今六月出征者
以玁狁勢盛事在危急故也朱善曰此所謂兵加
於已不得已而應之也
比物四驪閑之維則維此六月旣成我服我服旣成
于三十里王于出征以佐天子

賦也比齊也物力也比物而得四驪力與色皆齊也閑習則法也習之使合法也我服戎服也三十里一舍也古者吉行日五十里師行日三十里朱子曰戎服旣成卽日引道不徐不急盡舍而止見應變之速而不失其常度是也以匡王國者都邑震驚宜有以安之以佐天子者四夷不庭當爲天子鎮撫之也

四牡修廣其大有顒薄伐玁狁以奏膚公有嚴有翼共武之服共武之服以定王國

賦也修長廣大也顒大貌四驪閑則士卒之馬也
四牡修廣將帥之馬也薄迫也如肉薄登城之薄
獾狁已深入當迫而逐之也膚大公功也嚴陣翼
輔也中軍節制而左右軍輔之也共與恭同武服
軍事也三軍各敬其事則營壘固而備防周也如
此則軍威伸於外人心安於內而王國定矣所謂
佐天子以匡王國也

獾狁匪茹整居焦穫侵鎬及方至于涇陽織文鳥章
白旆央央元戎十乘以先啟行

言義抄 卷之十一
賦也茹度也整久駐也焦穫河東地名左傳曰許
君焦瑕是也鎬方河西地名涇陽在渭北織同幟
鳥章鳥隼之章前軍所建也白旆以帛爲旆繼旆
者也後軍所建也央央鮮明貌元戎軍之前鋒也
司馬法所謂選鋒也言獬豸不自揣度使其大眾
屯駐焦穫以其遊兵侵掠鎬方至於涇陽大舉深
入此不可與爭鋒宜出奇以勝之於是三軍結陣
不動使前軍選鋒十乘先行而後軍繼發獬豸懼
我之阻其歸路也於是乎侵者還而居者走矣

戎車旣安如輕如軒四牡旣佶旣佶且閑薄伐玁狁
至於大原文武吉甫萬邦爲憲

賦也玁狁旣走則王師不戰故戎車安也輕前傾
也軒後卻也後望如輕前視如軒則車平矣安之
至也佶壯貌閒調適也追之而言馬閑者緩追也
懼之使走而已大原晉陽也至大原而止者不窮
追也逐之出境而已其出奇制勝也可謂武其不
勤遠略也可謂文文以綏衆武以威敵安內攘外
之道莫善於此可以爲萬國之法矣

吉甫燕喜既多受祉來歸自鎬我行永久飲御諸友
魚鼈膾鯉侯誰在矣張仲孝友

賦也燕天子燕之也祉福也燕而喜之錫予便蕃
故多受祉也來歸自鎬者自鎬京而歸於尹邑也
我行永久歸告家人之辭也御進侯維也飲御諸
友不忘舊也魚鼈膾鯉不敢侈也諸友皆禮貌之
而常在左右者則維張仲以其孝友也武臣有功
則恐其驕常與孝友之人處資其和順以化其驕
心乃可長保其祿位矣前言有功此其善居功也

六月六章章八句

詩序曰六月宣王北伐也倉卒興師車堅馬
良軍政修也常服皆載器械備也獫狁熾而
我用急兵端不自我始也比物四驪畜牧蕃
也閑之維則訓練勤也不踰月而服成其材
敏也三十里而止舍其神定也好整以暇乃
大勇也有嚴紀律嚴也有翼陣法善也共武
之服臨事而懼敬慎不敗也烏章前軍白旆
後軍也中軍左右不可輕動前軍選鋒後軍

遊騎可擇便而趨利也元戎十乘用寡也奇
兵欲輕齎而疾趨故不可以用衆且旣謀成
不戰則不必勞費也以先啟行貴神速也閒
道疾驅以出其背使驚而內顧則不戰而走
矣有嚴有翼以正合也元戎先行以奇勝也
戎狄內侵利在速戰狼奔豕突難與力爭故
必用老成持重之將勿倉皇以失度勿見小
而邀功深溝高壘以老之堅壁清野以困之
別出奇兵以撓之截其糧道以饑之擣其巢